



Sesida dals

Communitgà ils

Protocol nr.

15 da december 2020

21 da december 2020

1051/2020

Dumonda Preisig

concernent il SCI da l'Administraziun chantunala da taglia

Resposta da la Regenza

Al cumenzament da la dumonda vegni menziunà ch'ils cas da "disposiziuns da taxaziun divergentas (u uscheditg curregidas) s'accumuleschian".

En quest connex renviescha la Regenza al fatg ch'i na sa tracta qua betg da disposiziuns da taxaziun, che han stuì vegnir curregidas, mabain da disposiziuns da taxaziun che divergeschan da las valurs declaradas. I vegnan numnadas differentas constellaziuns, nua ch'ils sbagls duain s'accumular. En quest connex constatescha la Regenza il suandant:

- *Davart gudogn accessoric ch'era gia vegni suttamess a la taglia a la funtauna:* En quest connex sa tracti d'entradas accessoricas ch'èn vegnidas quintadas giu cun l'Institut d'assicuranza sociala (IAS) en la procedura da rendaquint simplifitgada. Sche questas entradas vegnan declaradas en la decleraziun da taglia e sch'i na vegn betg agiuntà in rendaquint dal IAS, na po l'Administraziun da taglia (ATA) betg identifitgar l'imposiziun a la funtauna.
- *Davart betg reconuscher ils custs da viadi u reconuscher mo ils custs dal traffic public:* Tenor la giurisdicziun clera dal Tribunal federal pon vegnir deducids mo ils custs da viadi necessaris, e l'Administraziun da taglia ha l'incumbensa d'examinar questa necessitad.
- *Davart stritgar senza motiv la dimora durant l'emna:* Qua sa tracti d'in fatg che reducescha la grevezza fiscala, che la persuna obligada da pajar taglia sto cumprovar e che na vegn betg resguardà, sche las cumprovas èn insufficientas.
- *Davart betg reconuscher la deducziun per uffants:* Probablmain sa tracti da cas internaziunals, nua ch'i sto vegnir sclerì, sch'il conjugal en Svizra u il conjugal a l'exteriur po far valair ina deducziun per uffants. L'Administraziun da taglia s'orientescha en quest connex tenor ils supplements per uffants che vegnan pajads or.
- *Davart quintar massivamain memia fitg in'abitaziun a l'exteriur:* En quest connex sa tracti da la dumonda da las entradas e da la facultad ch'èn decisivas per fixar la tariffa. Las valurs da l'abitaziun a l'exteriur ston savens vegnir stimadas, perquai che las valurs correspudentas na stattan betg a disposiziun (p.ex. valor da l'atgna locaziun).

L'enumeraziun mussa ch'i va per gronda part per fixar ils fatgs decisivs che n'han betg pudì vegnir sclerids suffizientamain en la procedura da taxaziun. Exactamain per talas dumondas datti la procedura da protesta, en la quala var 65 % da las protestas vegnan approvadas dal tutfatg e var 15 % per part. L'inculpaziun che persunas estras vegnian tractadas en moda discriminanta, vegn refusada en tutta furma. I po dentant esser che las enconuschientschas linguisticas manglusas da las persunas pertutgadas èn in dischavantatg en la procedura da protesta.

La taxaziun da la taglia sin las entradas e da la taglia sin la facultad vegn fatga da las collavuraturas e dals collavuratur da l'Administraziun chantunala da taglia sco er dals uffizis da taglia communal e da las alianzas da taglia. En il sector da las persunas cun activitad da gudogn dependenta vegnan circa 75 % da las taxaziuns fatgas da las collavuraturas e dals collavuratur dals uffizis da taglia communal. Per quai paja il chantun ina indemniziun da var 7 milliuns francs.

Tar las dumondas 1 e 2: L'Administraziun da taglia na fa betg ina statistica da las disposiziuns da taxaziun divergentas resp. ina statistica tenor la naziunalitad da las persunas obligadas da pajar taglia. L'applicaziun TI na permetta betg evaluaziuns correspondentas.

Tar la dumonda 3: La disposiziun da taxaziun vegn relaschada da la collavuratura u dal collavuratur competent singul; i na dat nagin princip da quatter egls per la disposiziun da taxaziun. La qualitat vegn garantida tras differentas mesiras (guardar latiers la resposta a la dumonda 5).

Tar la dumonda 4: La protesta vegn decidida da la persuna che fa la taxaziun, sch'i sa tracta d'ina collavuratura u d'in collavuratur chantunal. Quai è giuridicamain admissibel e materialmain cunvegnet, perquai che la protesta è ina part da la procedura da taxaziun. Sche la taxaziun vegn fatga d'ina collavuratura u d'in collavuratur da la vischnanca, vegn la protesta elavurada da la cumissaria u dal cumissari da taglia chantunal. En quests cas datti in princip da quatter egls.

Tar la dumonda 5: En ils posts externs da l'Administraziun chantunala da taglia vala il medem SCI sco a Cuira. Las finamiras da qualitat en la taxaziun vegnan cuntanschidas cunzunt tras furmaziuns supplementaras permanentas e tras fixaziuns complessivas da la pratica. Las collavuraturas ed ils collavuratur dals posts externs vegnan assistids da lur manadras e manaders da team tuttina sco a Cuira. Tematicas difficultas, protestas u dumondas pli complexas pon vegnir giuditgadas cuminaivlamain.



En num da la Regenza

Il president:

Il cancellier:

Dr. Chr. Rathgeb

Daniel Spadin